

四庫全書

集部

欽定四庫全書

集部

茗溪集卷一

一至五

詳校官左中允_臣塘五珠

主事_臣呂雲棟覆勘

總校官知縣_臣楊懋珩

校對官中書_臣孫球

謄錄舉人_臣吳壽朋

欽定四庫全書

集部四

茗溪集

別集類三 宋

提要

臣等謹案茗溪集五十五卷宋劉一止撰一止字行簡湖州歸安人宣和三年進士紹興初召試除秘書省校書郎歷給事中以數文閣直學士致仕事蹟具宋史本傳按陳振孫書錄解題稱一止居瑣闥僅百餘日忤秦檜

罷去閒居十餘年後檜死復召仍力辭不起
年八十二乃終蓋亦守正不阿之士其歿也
韓元吉為作行狀稱其文章推本經術出入
韓柳不效世俗纖巧刻琢雖淹迤宏博而闕
鍵嚴備其為詩寓意高遠自成一家呂本中
陳與義讀之曰語不自人間來也是其著作
亦盛為當代所推矣行狀及宋史本傳皆稱
非有齋類稿五十卷書錄解題亦同此本前

有曝書亭印記蓋朱彞尊家舊鈔題曰苔溪
集不知何人所改又詩文共五十三卷末附
行狀一卷誥詞一卷凡五十五卷數亦非其
舊或後人掇拾遺篇增附其後因而更名歟
乾隆四十四年九月恭校上

總纂官

臣紀昀
臣陸錫熊
臣孫士毅

總校官

臣陸費墀

欽定四庫全書

茗溪集卷一

宋 劉一止 撰

古賦

秋郊賦寄友人

紛吾忻此凜秋子汨吾行此樂郊
卻游氛而曠恨子斥萬里于澂霄
日暘暘而逾厲子天迢迢而益高
潦水收而泓渟子微風過而蕭條
軼爽思以遐驚子逝幽懷之遠飄
神眊眊而直上子意渺渺而獨超
悼時運之不留

子嘉節物之見邀莽四野其無人子兀平崗之岑堯驚
獨鶴之清唳子咽殘蟬之三噉燕如客而歸告子鴈哀
鳴以求曹相老農之就閒子晚霜鏤之在腰登禾黍于
困箱子場圃晏乎其逍遙伐社鼓之坎坎子掛杖頭之
空瓢繁境會而情感子傷志大而形么獨相羊以無匹
子起悵望而翹翹嗟佳人之何在子倚翠袖而若招思
夫君而不可見子挽蓬首而屢搔歲月駿駿而遂往子
悵此情之不自聊亦何憂之不臻子緒軋軋其如縲總

事業之無聞子想富貴之不能徼將今世之舍旃子盖
令名之勿劬力古人而願學子泝千載而上交嗟人生
之南北子况截道之驚飈顧筋力能幾許子苟比音年

頻

而遠徭曾一飽之不謀子豈吾分之已叨世種種其奚
數子信我行之每勞豈無林壑之舊游子方駕言其出
遨策高足子青冥子昔歲莫其同袍通舊籍于禁門子
幸新時之適遭諒從此以遐舉子稅修梧以安巢彼出
處固異宜子奚獨緬想而心搖省定命之可安子人何

資於卜兆維南之山子有藪與肴維溪之水子可以容
舫既瀕我先君之幽宅子復舍此而焉逃營底身之三
椽子緝一把之蓋茅美秋月之如珪子又春卉之窮妖
飽松風於長夏子拾東畦之墜樵宜上天之見貸子賦
此樂其特饒希吾髮子岿澁散吾趾子山椒庶無聲而
無臭子眷壽命於松喬

三友齋賦

并序

余行年二十有四不知取友即家君游息之會別為

一小齋可方丈許當兀兀獨坐恨孤陋而寡偶也有
一麈尾命曰白友一拳石曰碧友一琴曰黑友因名
其齋云

劉子三友白碧黑也各以色稱因其適也謂友伊何心
莫逆也并我而四共茲室也不笑不言淡而默也不見
其損亦不見其益也客有造余曰吾聞古聖賢之取友
以人而不以物以德而不以色直諒多聞豈非德之人
與今子友是不可則也余曰不然天地剖判萬物權輿

適然有生若吸若噓寄一溫於全潮互出沒於太虛均
形色其天性奚物我之差殊審如子言則既惑矣雖然
請為子言之余觀世間爭名於朝爭利於途翕習沸渭
駘蕩溫舒閭閻紛其森羅冠蓋儼其馳驅淨者易染清
者易汙維是白友涅而不緇有於陵仲子之潔也高下
相形利害所怵信者可偽智者可愚勇者猶豫辯者咕
嚙摧百鍊於繞指回鼓瑟於吹竽維是碧友介然莫移
有伯夷氏之特也至於鈎絃柱指函宮泛商寫天地之

淳和雜古今之興亡或疏而越或暉而緩或奮而厲或
發而散國風雅頌和而質也騷人逐客忠而激也巍巍
湯湯奔放而岷岷也促促刺刺切切昵昵怨斷而幽憶
也余於是乎玩其聲而略其意寓於手而忘于心喜怒
悲憤初無所隨俄而奏罷風恬籟寂反於無迹是黑友
者其庶幾乎老聃氏之常德不忒也嗟乎余於三友雖
以物取而人存其間雖以色命而在德罔棄蓋所謂若
有德而不知其德者耶客俯焉而嘆爽然而自失出以

告其徒曰吾得取友之術矣二三子何患乎無友

苔溪集卷一

欽定四庫全書

茗溪集卷二

宋 劉一止 撰

古詩

小齋即事二首

憐琴為絃直愛棋因局方未用較得失那能記官商我
老世愈疎一拙萬事妨惟此二物隨不係有興亡

又

早夏甘雨零坐見草木長天憐官窮隘乞與風颭爽四

蒼溜通池激激聽微響雖非山林間故作山林想

道中雜興五首

瀕春欲生妍梅萼先媚好寧辭犯霜雪漸擬蘇百草耿
耿甘獨待餘恩及枯槁

二

姚黃花中君芍藥乃近侍我嘗品江梅真是花御史不
見雪霜中炯炯但孤峙

三

晴風掃頑雲白日光在地雲翳無幾何聚散等懸寄所
以寸草心各各抱根蒂

四

麥頭漸青青麥田何井井黃雲被原野衆草昏未醒方
知天壤間春風有畦畛

五

長亭連短亭隻堆復雙堆居然送行客歷歷記奔走十
里同五里先後無好醜

識舟亭一首

渺渺歸帆江北渚
脉脉相望那得語
舟中賈客嬋娟女
朝樂瀟湘暮荆楚
我欲招之問計然
浮名唾去如飄烟
買魚沽酒嘯儔侶
槌鼓弄笛凋殘年

過新開湖呈無言兄御史

整整斜斜村舍居
十十五五沙中鳬
潛魚釣影水深淺
高柳着行烟有無
天濶雲低過平楚
已覺淮音近吳語
淮南米賤好留儂
正恐不歸心更苦

腰鎌一首

腰鎌行稻區引挽親刈熟黃雲卧千頃彌望極平陸潦
水秋未收褰裳聽滿足為士復兼農自身仍當僕書年
賀豐稔天事誠委曲辛苦豈敢辭幸此卒歲蓄歸來妻
孥笑風日緇面目未覺城市朦生理係斗斛少年事筆
耕初不辨種稂讀書舌本燥得食僅半菽人言清有餘
自哂瘦如竹虛名真畫餅逸景等轉燭今我更百態漸
已不諱俗杯水重萬言囊錢踰滿腹却嗤祖士少未免

懷愧慙客來詎相訪底用身障簾

無言兄以銀壺作粥糜頗極其妙舟居夜饑頃
刻可辨戲作此詩

少年愛酒不廢沽滑稽鴟夷每隨車春禽似是知我意
日日勸我提葫蘆侵尋老境筋力異宿昔百嗜今一無
羈窮未免走四方是口時賴薄粥餬憐君巧作此瓢壺
善為口計真不踈上蓋下豐腹

昔人以腹大者為
胬肱上孤下都

空

洞可置升米餘釜湯外沸如隔膜氣塞不作聲盧胡須

更已復成淖糜勻滑不減傾醍醐蓬窓夜饑急星火咄
嗟而辦功可書山僧歛鉢未足詫考父古鼎非時須我
聞壺中有高隱日月或類蓬萊居神仙有無事恍惚山
澤形貌常多臞不如一飽睡清熟個中便是真華胥

盧駿元憲使寄示會稽競秀閣識舟亭二詩為

各賦一首

葱籠秀擁秦山落盡日春風吹嶺脚朝來領略到窓几
誰遣虛空出阿閣南臺御史去天近身與孤雲生兩角

古語孤雲兩
角去天一握

胸中摸索千丈絃更恐并吞有衡霍海門

山邊初落潮西興渡口浪痕高渺渺目亂翻雲濤心識
不語迎歸橈江亭晚日風蕭騷軋啞鳴櫓相向搖平頭
鴈落沙沒腰舟人底處尋青招

天長道中作饑來驅我去二首寄呈劉盧二御

史

初在錢塘與二
公相別而西

饑來驅我去去去復何之西風迎馬頭背日霜林披十
年京洛塵衣弊因改為豈惟衣日化面目亦已緇功名

誤少小辛苦道老鰥追惟中自驚恍聲失旦鷄安得如
虛空萬境俱一齊我心無去來我馬隨東西

又

饑來驅我去去去復何如我饑亦何慙所歎為此軀明
發著征衫薄暮投郊墟烟林號怒風牛背立饑烏境惡
夢多悻愁孤鬱難舒念初別鄉邦短楫穿菰蘆眼中兩
御史炯炯冰在壺清游失追攀負此山繞湖我行日已
西回首風牽裾兩公飫文章筆端吐新腴願言繼殘膏

茲腸正空虛

拱州道中二首

城樓百尺兀相望帝作東輔拱神州當日隋家漕渠柳
至今春在末梢頭

又

柳條明媚欲變色便想春思浩無涯行人牽挽不忍斷
云此生意方萌芽

家姪季高作詩止酒戲賦二首

淵明出從仕務亦計林田一朝倦束帶唾棄如飄烟無
酒每從人茲事若可憐醉來便逐客卿去我欲眠了知
此賢胸醒醉皆超然胡為遽止酒而作止酒篇此身後
萬物不使一物偏有偏即是累任性皆非圓我樽可忘
酒我琴故無絃攜琴玩空樽惟我樂也天

又

淵明賦止酒止酒未嘗止今朝詩固云從此真止矣我
觀他日詩說酒特未已必飲誠有累必止亦非理無如

作病何聊用忘憂耳得失定相半隨過無彼此何為我
阿咸深拒堅壁壘子言故多師烏有與亡是獨此止酒
詩字字如信史恐子昧圓通未究真止義嘗觀諸世間
一一等幻戲死生尚云爾何乃較醒醉操瓢起相從無
為乏我事

方時敏寄和詩復用韻報之并簡季高理前止
酒之語季高嘗夢蕭相國戒勿飲酒

疇昔城南隅蓮葉秋田田從公觴玉醪醉墨看雲烟我

乃世背馳公獨肯顧憐追思十年夢僅熟一覺眠念當
老扁舟生理師計然不意菰蘆中復見瓊瑤篇筆力如
置陣彌縫認先偏從容步武間左右方若圓大如清廟
音三歎聞疏絃安得化為雲追逐飛上天

又

阮籍劉伯倫嗜酒不知止顛狂欲求名此計真陋矣酒
中有何好正自未能已愁來得暫驅洞若適妙理我豈
沈酣徒公亦聊爾耳世間寄夢間未悟彼易此阿高志

得殊家學自中壘嗷嗷求獨醒今昨較非是無心窮酒
聖有意造詩史自言古鄩侯告戒存密義逡巡若神授
恍惚類兒戲不須更論酒春夢本如醉我知昂星精不
管太白事

次韻趙端直貽何子楚卜居山間二絕句

賀老晚乞一曲湖絕勝叔平千頭奴端直自是功名人
未用早計此索居

又

後堂彈絲嬌不止知有性靈雙婢子歌詞自製清如水
却怪驚塵暗中起

次韻子楚秀才

何郎卜築吞江湖下瞰培塿皆僕奴山川勝絕本相假

正復此士堪此居

子楚卜居富陽山下瞰九江

又

何郎歸與直至止所恨扁舟欠西子山高日長貪睡美
不有江聲誰喚起

贈道人王生一首

夜來清商入梧桐策策不已鳴霜風故烟一碧萬烟樹
慘淡已有傷秋容嗟哉造物本何意安得永賴長養功
獨我冷眼閱榮悴心與日出清霜融子奚不來助我喜
甕頭春風生麴米人間有酒誰不醉知其天者我與子
我身雖無雙羽翰欲將夢到三神山借爾八尺龍鬚席
遽然一覺俱飛還

家弟元成將叅部來取別是夕忽夢與元成跨

馬並行隱隱聞車轂聲如在道途覺而作詩并
以贈行

荒涼半畝居風烟夜沈沈安得清夢間尚有車轂音自
我客京華半世歷欹歎日月不相貸鬢有微霜侵騎馬
著青衫茲事已不任如何棲遲中心跡猶差參夢境通
前生染習良已深歲月不可磨愈厲如精金富貴豈足
道大是功名心勉哉子馳驅壯志方在今勿學嬾似儂
膏肓恐難鍼

次韻寄酬無言兄領政二首

鳳不出丹穴，姬孔歎且思。忽來乃為時，不計身安危。采
色炫世服，鳴聲漏天機。高梧寄孤巢，俯仰反自悲。矧復
鷄雀儔，妬喘如筒吹。我知盛名下，憂愒甚井眉。寵辱更
事耳，何異秦晉饑。生身寄世間，寧免相貸資。公乎豈人
謀，天特相茲時。奈何不自量，徑欲力撼之。如我實助喜，
良是昔所期。蜀牋冰不如，忽枉灑蘭辭。三復重太息，無
術可肉飛。安着筆如椽，空改生民詩。

又

自公之出矣豈不旦夕思人情劇險艱太行未足危十
年江湖心鷗鳥識忘機却來鷓鴣行方寸交喜悲晚被
天語溫習如和風吹凡公宿昔交誰不勝兩眉如我故
陸沈筆耕遇比音頻饑胸腹抱介介何以取世資時哉今
唐虞不出斯無時苔之水洋洋我饑實樂之如何磊落
人頗復誤見期誰能叩人門受彼在亡辭吸飲風露寒
身輕令孤飛明時自嗟拙敢賦衡門詩

與家姪季高夜語用毛內相韻

儒生習氣非偶然出入文史東西家掃除淨盡如宿草
春風一夕已復芽子方妙年有奇氣我已種種成蒼華
文章百巧坐一窮無地可學東陵瓜嚙齏山色吞湖光
凜凜尚可驅百邪子昔自云有仙骨夢騎青螭籊飛霞
要與李杜高頡頏下視餘子窘可嗟寒燈夜語耿不寐
自覺冰雪生齒牙頗言室有法喜妻幸是元無翁可撾
何如從吾巢雲巔共訪葛洪學丹砂

贈別歸安周縣丞二首

自我居里間連牆絕未去非我敢杜門客實莫我顧顏
然坐空廬習懶已成痼惟有一束書遮眼慰遲暮周郎
來何許文字得我怖淵源笑鯢桓采色隱豹霧追隨古
汀洲山色入幽步詩文互徵逐酒鸞及時具如我衆棄
餘君意獨何慕入蘭室知芳逐臭無乃誤君亦忘機人
足跡亂鷗鷺堂前種白蓮心境涵淨土觀空本無說目
物自吐露往來忘時節相對兩如寓屈指說去官始憶

三年住輟然同一笑歲月真脫兔我不記前三更問未
後句

又

庭前百个竹眼見三隕籜不知如許久已復東行橐君
初先住想晚去亦不惡官身等出家隨牒即行脚笑傲
雲烟間何適非至樂嗟我獨奈何生理自窘縛四十三
年非醞造此大錯從今便上上萬事付莫莫張公留衣
鉢綠蓑與青筇會當老扁舟相與同啐啄更看後五日

放過前一着

宿溪口一首

溪聲來天邊風水共豪縱夜氣劇奔馬侵曉不能控書
生有情癡詠雪寧忽凍胡為枕寒流故遣不成夢

賦建安林尚能家追遠堂一首

履霜存永慕風樹寄悲惋古來孝子心百歲常輾轉雞
豚逮親存適意寧一嚮他時轂千乘泣涕顏有覲生世
苟如此豈得但理遣所以奉當事自竭詎不勉尚能七

閩秀器識頗凝遠求官自束髮捧檄恨晚晚歸懷追養
勤作堂近山巘欲招九原魂髣髴此息偃牛羊家自腊
菰韭傍可剪春秋及時禮情物兩俱腆遂令里間兒歎
詫知禮典孰先如此堂孰孝如此悃從今大爾門至行
神所戩

茗溪集卷二

欽定四庫全書

苔溪集卷三

宋 劉一止 撰

古詩

宋景文公之孫景雲得玉龜印有忠孝侯印四

字示詩次其韻

寶器藏家寧亂出漢爵通侯二千石懸知忠孝萃公門
寸印便應輕尺璧虎頭飛去通神畫未免誑欺涉嘲罵
餘不左顧非偶然渭水得璜天或者公門次第生輝光

一一詞鋒如劍鋌龜玉正憐俱在手莫放桺中蒼兕吼
舍弟出家作詩貽之

在家情意踈出家終不惡不有清淨緣云何脫徽索我
昔志婚宦謂足世味樂顛倒十年間如蠶竟自縛業已
無奈何勸汝莫莫莫一漚非全潮起滅皆妄作當知自
身浮流浪恐非託伎倆百不好攝念乃初學如病求真
醫安心是良藥

和巒整二子寒食少天色五字

霧雨昏不醒東風曉能酸我食日不足寧憂三日寒去
年今日時桃李半狼藉能隨里門兒買餽作寒食人言
二月時霏雨生樹杪天色何時光要向寒食少江南舟
輒鷓江北馬連翩經春不能賞誰云不關天春風未渠
尖花草有矜色醪醕會傾城牡丹欲傾國

太守生辰四首以受天百祿為韻

漢城欲回春梅柳詫先受江北迎兩轡江南試春酒得
州古云樂渠閣大如斗要對歲寒姿一笑閱好醜

二

朱轡世功名地接韋杜天勤勞三十載始着榮途鞭淹
速會有時用舍何其賢或者相棄除天公賜長年

三

杯觴誰聖賢翰墨自主客一醉迎春風麗思發幽蹟河
東豈無賦諷一或勸百願公攄梗概早晚煥簡冊

四

長松倚青壁千歲身不老下顧蓬艾姿生意何草草願

言雨露甘餘潤及枯槁耿耿心有憐得廕苦不早

夜起觀雪一首

寒空夜作山林聲打窓窸窣饑鼠行褰帷忽怪牕淡白
開門雪飛縱復橫天上瑞花開又落庭下踈梅初破萼
忍寒耐苦發孤妍似與老人甘落莫遙憐國難何時清
嗣皇求衣天未明長蛇封豕欲薦食執筆固陋慙書生
皇天悔禍今可卜乞與江湖比歲熟莫言此雪不樂饑
便是天公真雨粟

待潮浙江口寄左與言大夫葉元亮學士兼簡
吳似之一首

今日江頭雪欲作，濤怒風豪兩噴薄。
青鞵黃帽湖海人，獨立沙邊如病鶴。
閒身不待君賜與，擬向風烟佳處著。
如何寸祿晚見招，踉蹌欲前還欲却。
翩翩西湖兩公子，胸次崢嶸飽邱壑。
糟床夜注喜相投，自發清吟侑觴酌。
我來一笑豈易得，十載湖山負佳約。
間關百態成底事，毛髮星星已非昨。
人間俯仰變古今，總是潮生與潮落。

會須乞取此身健在眼好山俱著脚頗聞神方能却老
肯輔衰殘殊不惡因聲更約吳太史石鼎他年煮仙藥
與言元亮時見授
胎息之方煉丹藥

送樓伴張吏部還朝一首

中臺縹緲神仙居退朝往往聯飈輿追隨五城十二樓
鞭鸞笞鳳相嬉娛一一氣貌清而腴下哂山澤皆臞儒
虛堂夜直冷不寐博極天上人間書云取小雅大雅詩
賡續二典竄禹謨塵凡豈得追步趨夢境欲到猶趨趨

望即何事飛輶車東浮江淮絕句吳天令賤子得所圖
邂逅實始迎郊墟公不鄙我置坐隅假以色笑安且舒
乃知仙風自恢廓不邀我敬憐其愚從容自喜吐傑句
屏息側聽仍嗟吁朱絃疏越清廟奏一唱三歎音有餘
何劉沈謝氣力短郊島輩行不足奴惟公妙年擅場屋
一日聲價騰八區諸公貴人交薦達帝以見晚驚嚴徐
要津已復更步武簪筆會直承明廬頗聞細書問良苦
便覺風信催旋艫公歸儻辨報明主物色士類供時須

班公駟僕我不如山林鐘鼎端異途何王之門曳長裾
半生鼓瑟從吹竽逝將爭席朋樵漁正恐不免饑見驅
間關老矣尚耿耿所覲肝膽從公輸他時門下有此客
終夜彈劍非無魚

雪夜一首呈傅舍人

朔風無端卷人幙短檠淒淒吹花落怪來覓句如斲冰
門外雪花如舞鶴老妻自起傾殘樽麒麟活火紅燉燉
憑君為喚詩腸溫他日有酒不足論

憶山中一首示巒嵒二子用前韻

世路歌危如燕幙未厭山中昔牢落春前擷韭秋擷菰
有客有客鵬與鶴瓦甌鐵杓文石樽枯樵發火勢易燉
得酒徑就山僧溫聽風聽雨取次論

次韻方允迪祕監九日登高一首

九日意蕭條病卧如漳濱紅萸起自揷黃菊茲及辰身
落芹藻間心與鴻鴈親想見龍山遊嘲謔落帽人春塢
瀛洲客共此溪港鄰白髮俱許長清愁浩無垠四年京

華別前事寧忍詢國恥久未雪憤切此逐臣革路何時
還今誰叫穹旻駕言寫心憂一洗衣上塵扁舟羨鷗夷
舉酒憶季真目極樵徑風便擬從採薪但恐嵌巖中不
着功名身報國君尚強我拙甘長貧

水車一首

村田高仰對低窰咫尺溪流有等差我欲浸灌均兩涯
天公不遣雷鞭車老龍下飲骨節瘦引水上泥聲呶呀
初疑蹙踏動地軸風輪共轉相鈎加嗟我婦子脚不停

日走百里不離家綠芒刺水秧初芽雪浪翻壠何時花
農家作勞無別想兩耳未厭長嘔啞殘年我亦冀一飽
謂此鼓吹勝聞蛙

和雲門行持長老十二時辰歌呈同遊二三子
虛堂怖鬼鼠窻窰牀上鬥牛由蟻窟將軍見虎箭羽沒
免起鶻落不待咄初心學道如龍頭習疑玩久蛇尾收
雲門倒跨一木馬追風相羊踏九州諸賢巧思生棘猴
碧雞談辯不肯休煩師放出索湖狗騎猪南穿聲喧啾

從謝仲謙乞猫一首

昔人蟻動疑鬪牛我家奔鼠如馬羣穿牀撼席不得寐
嚙噬編簡連悅怱主人瓶粟常掛壁每飯不肉如廣文
誰令作意肆奸孽自怨釜鬲無餘葷居家得猫自拯溺
恩育幾歲忘其勤

仲謙云水中得棄猫拯救久之乃復活

屋頭但怪鼠跡

絕不知下有飛將軍他時生因願聘取青海龍種豈足
云歸來堂上看俘馘買魚貫柳酬策勛

次韻曾宏父見貽一首

東巡屬車何大勤鐵馬風趨過吳下周宣自有中興日
天厭氐庭尚須暇所興吳越天有年汙邪委地連山前
與君步屨探禹穴感時興物俱惘然一官寓目家傳久
暮景差池亦何有遮藏要見太平時狐死何曾忘邱首

二禽言

婆餅焦游子饑游子饑泣路岐耕牛殺盡飽狂虜桑下
老農心更苦

又

泥滑滑風蕭蕭烟雨昏獨木橋軋鴟鳴櫓逆風搖行子
終歲事遠徭使我心悸不得邀

和胡浚明村中好客稀五字併作

青山為郭雲當門疎烟細雨梅花村門前落澗瀉寒溜
滾滾似是通河源隱居二士清而通談道不愧將無同
何人載酒問奇字糟牀夜注時一中天驥權奇嗟欲老
家有龍駒頭尺好孫郎並舍真可人散亂書籤共探討
只今干戈迷所適我亦間關暫投跡君家鳥雀不驚人

應怪蒼黃如此客謀身已拙知道肥遯得此良亦稀
化雲所願四方遂念絕側翅隨人飛

送吳興太守盧給事赴兵部侍郎召四首以邦
家之光為韻

東風催行艫旌旗轉修扛千騎如登仙我心豈得降
學初元年德意孚萬邦不戰屈遠人威聲疾奔瀧
惟幄舊分符隔濤江尚書古司戎名實尚能雙折衝
要從容談笑空酒缸帝曰汝遄歸謀國資敦龐無庸斗大

州洪鐘受微撞

二

汀洲初櫂迎紅紫爛朝霞及茲理旋艫綠陰已籠沙使
君如東君來去不戀家獨持五色筆摘辭燦芳華明年
鳳凰池春風浩無涯須公賦丹青去路不可遮

三

公來臨我邦天意若見私從容坐席間風化已四馳民
曰吾二天士曰得我師庶幾少淹留子弟公教之如何

去不顧公豈要我思不見溪上山旦暮發妍姿及茲有
行色風日含悽悲公亦何負渠欠渠百篇詩

四

西雛拜顏色振鷺俱分行繡衣浙江濱再上君子堂首
尾二十載持橐侍明光厭看南朝山易綰吳興章煌煌
朱兩轡照我梓與桑怪我衫始青憐我髮已蒼頗復見
勞苦感慨激中腸向來官如泥葡萄換西涼剪來但鳴
悲坐閱百鳥翔公為世良師醫國有禁方頗聞藥籠中

臭味久已嘗小草在遠志未用出聲妨採掇公弗疑結
根稔風霜

張侔生辰作質龜相鶴二詩為壽

神龜異生稟懷抱黑與白蹢躅守叢著遊戲引蓮葉青
雲覆其上文字書左脇千年愈堅瘦腹背類璆鐵有如
盛德士秉志厲霜雪不求赫赫名羞作翕翕熱行藏關
理亂閱世自明哲時哉此唐虞負圖追往諫

又

黃鶴初出胎骨格已驚衆翩翩謝囂塵颯爽自神縱朝
飛出芝田夕飲下雲夢寧知風霜質乃係世輕重有如
賢達人胸腹抱空洞觀時自隱顯豈待吹噓送會看九
臯鳴一一律呂中閱歲千六百羣飛接鸞鳳

千六百年
飲而不食

與鸞鳳同羣
見相鶴經

曾宏父將游吳興示所和葉內相八首次其韻
太守亦和故并及之

蘋洲景物最惱客無賴山色只供愁短棹從渠係烟雨

春容併作水南頭

二

並山微徑自曲折野人種花無數溪太傅風流猶可想
樓船皓齒合招攜

三

謝家溪亭花鎖碎尚憶故歲春未闌覓得小航衝雨去
溫紅飛處忍朝寒

四

佳君覓句自超絕

一作逸

江邊烏柏能絕人我疑祕思有

天巧澠漾胸中百頃春

五

官閒亦復一笑適理櫟及此春日晴追吟乃得伯宏父
便覺侯喜無詩聲

六

老來文字讀不入抽思軋軋如涸泉從君敢作入社客
正恐釜豆相泣煎

七

有懷玉堂前學士典冊汗漫真金潮子向白雲深處覓
面山溪館帶長橋

八

翰林久袖經綸手筆力游戲吞山川要試臯夔致君術
不應牢落著幽禪

苔溪集卷三

欽定四庫全書

苔溪集卷四

宋 劉一止 撰

古詩

南山有蹲鴟一首示里中諸豪

南山有蹲鴟春田多鳬訖何必泌之水可以樂我饑六
師擁行在閭巷屯虎豹民食尚可紓軍食星火移努力
輸縣官無乏轅門炊所願將與士感此艱食時忠義發
飫腹向敵爭先之驅逐狐鼠羣寓縣還清夷我輩死即

休粒米不敢私

聞杭州亂二首

饑來命餉寒索衣官家養兵如養兒時平軍律久玩弛
轅門笑歌驕莫隨往時金陵囚刺史今者杭城漕臣死
稽天狂焰窮朝昏千丈紅霞炫江水隣州之兵如此兵
嗚呼此難何時平

又

縋城將母走者誰吾宗貴人丞相兒高門潭潭深如海

一朝赤脚踏路歧吁嗟身世何所有金帛滿家那得守
衣冠自古皆賊仇玉石俱焚無好醜嗚呼安得貧富受
用勢略齊無庸懸絕產禍機

傅子駿右司見和雪句且有兩宮北狩之感復
用韻二首

萬里胡沙驚毳幙北望旄頭天際落向來官軍如路人
受甲逡巡惟指鶴寧知竟屈鑾輅尊問天火令何當燬
落雪如絮不我溫九閭夢想血面論

又

先生著書風撼幙詩成弄筆雲烟落舍傍種竹欲招鳳
郭內有田纔給鶴眼看雪片黏空尊寒齋芋火猶能燉
怪我官冷何時溫我亦聊爾公弗論

次韻方允迪祕監步月感懷一首

伊昔苔水濱詩酒相迎送紅蕖三百頃天遣作妙供於
今幾何時喜懼不同夢驚心風月夕怨笛有殘弄所嗟
老侵尋不愧官冗從當時季孟間衆識長雛鳳寧知天

一角復此樽酒共文章千古事習氣無乃重詩如朝陽
鳴一一律呂中從遊二三駿蹀躞不受鞿阿威有家學
落筆競豪縱傷時復懷舊一笑得再慟公等俱勉旃如
我堪底用

允迪以羊膏瀹茗飲呂景實景實有詩歎賞僕
意未然輒次原韻

精金不受釧釵辱瑞草何曾取膏腹乳花粥西名已非
薦以羊肪何太俗山林鐘鼎異天性難遣華腴偶窮獨

森森正味苦且嚴玉質無瑕誰敢戮君家饌林多錯本
讀罷流涎誑枯吻故令茗盃變腥膻遠想黃封雪花醞
呼酪為奴逢彼怒自惜爭雄巧相妒我寧不飲信我說
獨喜君詩有神助君不見穆家兄弟故可人概以骨鯁
恐異趣

將如京師和方時敏機宜十二辰歌一首

羣兒鼠竊均有遇老矣自知牛後誤成功未解鬪兩虎
援翰徒勞禿千兔佩書巾首何龍鍾靈蛇光怪蟠心胸

馬頭二千悲遠道羊角萬里無高風秦歌嗚嗚楚猴舞
一笑何如共雞黍謀身狗苟君勿嗤聊戲墨猪書韻語

昔人論書云瘦為
形枯肥為墨猪

五十少公卿贈何子楚居士

五十少公卿三十老舉子世間老與少不必較年齒我
觀宦達人顏色自豐美癯者忽易腴變化一日耳人言
老再少信是有此理我為老諸生流落踰二紀四十又
過四渙湮百僚底說老已十年何況真老矣壯氣摧幽

憂髮白面目緇寧有再少時一衰乃如此何郎窮過我
齒髮亦相似閒居傲軒裳臞腹滿經史時時吐光燄麗
句落窻几誰家肯終惠試此足千里空令坐窮獨閤戶
今埽軌宦達世共慕閒曠我所喜丈夫生世間要自發
奇偉富貴何足云功名半張紙古來傲世士良是窮乃
止未有如子年忼慨隱廛市我不愧公卿愧此少居士

水村二首示友人

浮花蕩漾青蘋小綠柄歌垂剪刀草朝從港東暮港西

採花擷草無盡期秋光有盡意無盡萬馬奔騰小作陣
眼中未飽公莫回饑腸作惡如鳴雷

又

張公一生雲水客往歲孤蹤寄苔雪故人刺史眼為青
願為泛宅浮清冷當時鷗鳥難問跡尚有水村名泊宅
碧蓑青笠寧在無令公仙去當傳余

借居鷗鷺山中一首呈方允迪道蹤昆仲

長松舞高寒落澗瀉清泚笙簧響天上金石鳴地底雲

容何潤澤下有隱君子樂此山水音清若變流徵怪我
從何來塵土兩目昧寇戎在江許薦食心未已赤囊走
邊報朝暮異憂喜安知隱人樂勝絕有如此古來成敗
事不入山中耳願言晚相收寘我巖壑裡酌泉得醒心
茹水可不死况有載酒人半道同栗里

屢從道蹤飲其所居在半道間

山居作拆字詩一首寄江子我郎中比嘗以拆
字語為戲然未有以為詩者請自今始

日月明朝昏山嵐自起石皮破拈壁古木枯不死可

人何當來意若重千里永言詠黃鵠志士心未已

次韻鄭維心貽盧叔才一首

朝行轉木末暮返循水涯生長山水間途窮自知歸萬
緒更擾擾衆目何睽睽有若脫羈牛邂逅得此時坐念
盧夫子與世真背馳讀書如董生三載圃不窺清詩見
真情觀者豈得疵春風入閭巷爛熳百卉菲摩腹忽起
行菜茹傷蕨薇平生經綸學無術取世資貧交可相覓
叩門兩無疑富貴不汝求吾至君勿揮

次韻維心謝沈尚書惠筆一首

書生磨吻鉛刀銛君家手筆不退尖琢成秀句奪天巧
平捐鮑謝奴高錢郊寒島瘦復可哂漢風楚國真能兼
胸中疾邪茹不吐但覺忿氣生虬髯巨堪陳壽書漢實

毫端有口可得箱

維心修
三國志

尚書昔侍金華講論議凜凜

秋霜嚴曾將一字竊魯史

尚書曾
講春秋

未用三語求阮瞻今

召賜筆助清峭雕屏鏤象光出奩如吾樸遯豈足數半
世翰墨徒心潛老去文章讀不入編帙散亂如投籤因

君窮討默自愧僻魯成痼何時砭須要盡見君家書稿
死不歎周南淹更從湘東覓金管賞激忠孝祛妍儉

謝吳興守李端明致酒一首時寓德清

孔愉廟邊溪水長石壁巖下飛泉香居士住此幾寒暑
只見四山青又黃今年春雨摧麥芒六月稻穗乾欲僵
煩公焦勞坐黃堂何不趣公歸贊襄為時開閣陰與陽
不令此憂遺君王我君有如坐甌內口顧怫鬱不得驤
公欲令我蘇肺腸白衣致酒甚沛湧瓶粟未空陶氏倉

得酒且到王生鄉更招山前老漫郎

謂沈次律

渠家曲柄荷

可觴

大梅山法常禪師隱居餘姚南梅子真所棲有僧尋拄杖迷路至蒼前問師住此多少時師云只見

四山青

又黃

月出一首

東峰高如屏月出久未知竹影忽上牕淡臺時參差出入坐數息暝久息愈遲舉目月在窓便覺心境移平生浪紛擾自省點半癡歲晚得此身終焉以為期山中有寒暄我不記四時樂此見有初非關未忘詩

剡溪道上

一水縈不斷，千巖翠相扶。
孤篷載雪歸，我昔見畫圖。
今年兩經行，明晦自慘舒。
早夏山若焦，秋至潦溢途。
是中無故人，王事當馳驅。
景物寄心賞，隨愚便有餘。
不覺老季真，乞歸尚狂踈。
官家賜閒身，用底一曲湖。

觀大龍湫一首

峰頭鴈何在，井底龍不出。
吐作玉虹流，倒挂二千尺。
落澗勢初緩，漸聽轉山急。
唳面飛雨過，着衣晨霧濕。
造物

等幻戲此地真絕特勿言王事勞遇勝得小立慙愧大
尊者幾載面青壁山高不礙見泉聲不妨寂

次韻建安劉彥冲學士寄茶一首

寒溪日漱枯腸潔自志窮愁漸陋劣故人不愛北苑春
更遣清甘嚙吻頰只今相望如參商武夷孤絕雲蒼茫
底事坐閱百鳥翔要偕玉川風兩腋高飛令吾墜君傍

賦程伯禹給事漫吾亭一首

時伯禹至宣城

道州固傷時晚歲吾山溪彼物何曾爭我自分兩畦宣

州絕代賢雅志蘇羣黎胸次已崢嶸不肯露角圭何從
得漫名正恐亦偶題渺觀身世空萬境俱一齊浪云出
處殊不悟東自西向來功名轍復入山水蹊公今持左
符早晚朝金闥生賢出世間渠能絕攀躋要須了此心
泛應忘高低昔我蓋已漫今我亦非迷

獨居會稽官舍送僧遊龜溪因記寄聲弊廬

老人年六十生理常刺促歸無一稜田此事亂心曲妻
孥渺相望幼稚炯在目師今遇龜溪山水無盡綠石壁

嚴寶坊泉甘宜杞菊但恐齋厨空眼飽不救腹並行山
徑微草露濕人足師訪老人家門前有修竹

酬王元渤舍人方智善學士求余作墨竹一首

余所居似賢堂蓋先伯祖雜端為竹
製名今竹與故勝皆亡因叙此意

堂名似賢人似竹瘦節孤高照岷谷百年人與竹俱化
尚有諸孫來借宿家風愛竹餘底事至今十飯九不肉
惟應說食誑枯腸更寫寒梢媚幽獨王郎散帶談清虛
為竹造門顏不忸方英炯炯貌臞甚門倚江干千个綠

兩家人物摠風流石壁山前烟雨秋豈惟千首輕萬戶
胸中世襲瀟灑侯我乃癡絕非畫絕憐此霜根貫金鐵
短綃淡墨持似公更聽我詩聲激烈

題等侯軒一首

姚氏庵種竹萬个道人瓊公邀予坐其傍余因名其軒曰等侯

且為他日子孫封侯之識云陸龜蒙詩云湖山自是清涼國初竹合封瀟灑侯

蒼官與青士都封瀟灑侯萬个儼相持更比千戶優道
人心安樂可念過不留延我聽風牕淒清韻天球傍瞻
卧麟冢卿雲覆杯邱前峰鬱岩崑落澗緣道周居然氣

象異況乃世德修他日名可占子孫荷靈休

訪石林葉少蘊觀文二首

卿雲覆其上草木爭鮮新竹露先參差晴曦破蕭晨萬
石紛拱揖靜默自主賓似中有老仙雲霞煥精神朝暮
林壑間搜抉出怪珍風歌青筍笠雨墊烏角巾山靈指
山謂此是夔龍身如何輕世累蕭散與許真了知褒衣
貴未若巖石親功名乃棄餘道德受咨詢我來追步趨
且復結勝因劇談到義皇愧此真天人

又

夔龍在邱壑神物發幽秘森然萬瓊瑰參錯分位置踞
地猛獸伏拏空孤鳥厲先後相長雄突怒疑攫噬各以
奇自列寧謂我獨嗜羊酪非不珍蓴羹有至味鄭公信
骨鯁我但見嫵媚種竹被嵒巖惡木不得地荃蘭偏九
畹歲草慄無類造化初何心被物自殊志那知此巖傍
閱世等如寄願言賦丹青遠近同一視

次韻倪文舉芮國器扁舟見過溪上之作

韻有兩玉人風流晉宋間況復子倪子妙思輕小山訪
我相後先知我倦飛還僮僕怪主人羈縻如在閑何曾
得此客能使意緒寬從今望仙舟我門肯常關春風孔
郎溪松下荆可班

几上人名所垂舟曰釣月庵求詩為賦二首

古德杖頭挑今師竿下取月滿體自如清光無處所

又

昔人釣忘餌今師亦忘鉤靜夜江不湍孤光送歸舟

雙頭黃芍藥二首

漢宮時世妝承恩嬌姊妹解道根蒂同如何心兩背

又

映立自亭亭吸飲風露饒不作恩與怨世間兒女妖

龜溪左顧亭二首

餘不溪上山映我杯中綠我醉狂欲歌潛蛟睡方熟

又

溪面寒無風澄瑩千丈綠我欲放輕舸霜鏡不敢觸

苔溪集卷四

欽定四庫全書

苔溪集卷五

宋 劉一止 撰

律詩七言

次韻虞仲容詠雪一首

十年九作窮途客，慣見天花面旋飄。
江上舞鷗如背我，沙邊立鶴獨齊腰。
衣黏落片行呼酒，船觸輕冰平渡橋。
誰識此時詩思亂，緩歌黃竹想西瑤。

宿揚子江口一首

客檣沙觜渺縱橫二紀風烟老此行待得江頭明月出
却當船底暗潮生旅人夢冷無留想別浦帆歸有呼去聲
聲斷念此生惟付酒為誰驚走撰瓶罌

次韻朱賓老刪定月夜相訪一首

一水相望十里餘扁舟夜載月明俱今君身為故人出
我亦年來此客無夜久燈孤疑是夢樽空僕卧不成呼
殘年會見干戈息共買嵌巖著老軀

次韻宋希仲侍郎見貽一首

今古宦遊長作客每逢佳處欲忘年頗將幻境觀塵世
始信臞儒是列仙野色分橋山帶邑晚雲藏寺水黏天
公身未屬烟波管莫向津頭買釣船

睡足齋一首

此地誰令著此翁角巾欹倒鬢如蓬興高絕壁松聲外
夢破寒花雀啅中睡債幾時償賽足書淫前日洗除空
故人若問安心法一酌村醪薦晚菰

摘星嶺一首

蕭磴緣梯興未窮青冥有路欲乘風朝雲暮雨在脚下
井鉞參旗落手中此世此身長作客半癡半黠忽成翁
枕拋偃蹇巔崖上一洗平生眼界空

次韻鄭維心詠梅一首

山路雪消梅半吐隔林光已見疎明凍醪似蜜從誰賞
斲句如冰得我驚卧樹照溪春思淨細香留客暮寒清
胡塵未遠遶風急十載花前笑不成

次韻林少瞻遊禹廟一首

客裡杯觴不易逢
越王宮好莫匆匆
春容雨打風吹後
山色朝來暮去中
京國昔從秋序別
齋厨猶憶飯時同
清時更作他年約
七塔三山夢已通

元日得雪三日立春

斗柄銜山晚直寅
夜聞笳鼓又迎春
尚欣窮臘酬三句
更見嘉蔬繼五辛
鳩杖多情扶我老
琪花有意為誰新
甲兵不用銀河洗
始覺今年一笑真

比過石壁訪王元渤舍人欲觀棊戰聞同魚軒

出遊獨與戎琳二師對語久之明日元渤有詩
見貽次韻奉酬

緩緩遊春且莫催而今揮塵短轅回一百五日天氣近
二十四番花信來賭墅未容窺謝傳印心聊復探黃梅
歸來索共梅花笑老眼如何得暫開

次韻奉酬元渤見過奕棋小飲及觀館閣題名
之作

珠玉當年歎吐成元劉何自敢齊名夢回雲海西崑速

春到江村北渚明誰為少陵償酒債更憐侯喜得詩聲
杯中賢聖君休問局上光陰我獨驚

方欲相約為孔侯溪上之遊忽辱佳篇復次元

韻

山色溪烟淡墨成隔溪幽鳥自呼名未妨濁酒陪心賞
更借清詩作眼明桃葉不關今夕恨松枝猶是古時聲
扁舟醉後從漂兀到處應無寵辱驚

次韻周秀實監永嘉仲府判叔姪貽王元渤舍

人二首詩中見反且恨不與奕棋之會

不踏清門曉鼓朝山林真樂在朋曹烏衣賢冑風流遠
赤壁諸郎氣義高底事裁詩多態度也應索酒甚粗豪
殘年我獨棋中影從此天刑儻邂逅

又

人言我老是頑仙坐隱紋枰不計年何用山屨分小大
直將壺嶠比方圓爭雄未羨七擒略見事常輸一著先
好覓周郎雲水外紅渠千頃藕如船

次韻鄭維心見貽一首

身病何因到赤墀
眼昏不復下書帷
杯觴有限長羞澁
故舊無多足別離
對白抽黃餘習氣
看朱成碧記當時

看朱成碧醉中眼
施粉太白樽前人
此維心舊詩僕初
相識時所見也

江村投老俱牢落

猶喜詩情似拾遺

維心以僕假守毘陵與嘉禾南徐弟姪分符接

壤作詩見貽次韻一首

家風五字作長城
四至何曾慕九卿
問舍山林端欲老

分符湖海尚叨榮
北南二阮俱貧士
大小兩馮慙頌聲
獨羨書成鄭夫子
會令千載意分明

次韻萬廷老見貽一首

時共語於
梅花亭上

梅花村上駐歸帆
知有幽人住此菴
誰遣疎香隨舵尾
故憐春色在枝南
溪前水落沙痕出
門外山橫雪意酣
詩似何郎情不淺
更留會處後來談

次韻王柱史題密印師寮一首

巖下風清進竹涼
道人身共翠梢長
饑腸欲和春泉響

鼻觀先叅煮菜香何處人間有癡黠不將身外較閑忙
鄰家柱史哦詩夜未厭敲門月到牆

留題呂宣義知命小園一首

雖無萬竹等封侯半畝清陰趣自幽
松蘿未能供早晚
菊蘭聊欲記春秋歸來久已同彭澤
休去寧須問石頭
短褐飄零嗟我老他年未往亦風流

登學宮城牆眺望寄曾宏父

寂寞無羶老鄭虔登臨此日意茫然
雲開孔渚炊烟外

春到西城戰血邊江草喚愁無畔岸官梅動興得清妍
南風藻思傳家舊好寄東風御柳篇

同諸曹泛舟城南曾守釀酒示詩次其韻

十年溪渚夢經行更借風烟作眼明官身擬赴鷗鷺約
小敵忽逢詩酒勅今者不樂愧幽子日後欲醉無麴生
五馬會尋芳草路肯教綠葉便陰成

題章右推砥齋一首

今古時清罰亦清由來讞獄賴儒生將軍誤怪獄吏貴

廷尉今稱天下平萬態詎容逃水鏡此心真欲似權衡
公家世德高門閥更看陰功踵令名

題道場山一首

雲亂修堂水不如妙香隨處滿空虛頭陀浩劫衣塵在
回向此生心地初涉世情疎終簡懶愛山緣重費消除
道人勸我發深省相對五更聽粥魚

莫師文以訪弟調官巴川用周子醇韻作詩贈
行

三刀昔夢劍東川援筆今看峽倒流晚歲拾遺長憶弟
異鄉王粲忍登樓微官等是身懸寄平世何曾道阻修
他日歸飛兩黃鵠伴儂苔渚共賡酬

次韻邵子非見貽一首

夢想丰神不記春相逢欲看夢中因安知晚歲歸吳客
却見當時入洛人

僕崇寧間與子非同學校今始相識

賦似文園真有氣

詩非子建諒誰親會須剪燭西窓語莫怪床頭酒事頻

從子非登月波樓戲用前韻并簡何子楚

洗醖初嘗麴蘖春一樽相屬是前因
忽驚萬頃月波上相對九霄風露人
十載京塵如夢破半生鷗鳥已心親
他時喚取何郎到要遣官梅動興頻

寄燕山帥幕家姪季高一首

疇昔江湖自在身而今騎馬犯邊城
寧無楚尾吳頭夢歷徧燕南趙北春
壯士似渠終有遇衰年如我尚誰親
屈州抑縣不伸里老此嶽嶽可笑人

禹廟一首

苗山風馭日翩翩人道桐棺葬此巔今事獨聞鵝種麥
故村不見鳥耘田遠憂邊塞清無日更望倉箱屢有年
收攬封疆歸禹貢忍看兵氣汙山川

謝會稽守翟內相臨學行鄉飲酒之禮

清曉傳呼振戟衣泮林雲日炫旌旗風塵貼妥投戈後
色笑雍容勸學時先世流芳今有繼聖衷圖舊正疇咨
王褒願草得賢頌可但中和宣布詩

次韻方允迪祕監會稽相遇懷吳興舊遊二首

故山疇昔奉英遊老去功名失路頭江海一官如許冷
田園三載不知秋謝公塘外千峰紫何楷廬邊一徑幽
心折少陵存歿句恨無酒力破勞愁

舊遊方時敏吳亦虛皆已物故

又

鑑湖列嶂自天開雲色嵐光入酒杯忽遣同遊有陶謝
故應交契擬陳雷他鄉日日典衣醉公事時時牽馬來
要買扁舟窮勝絕共追樵徑晚風回

檇李從允迪借居鸕鷀源上沈必先侍御有詩

寵其行次韻并呈二公二首

飄零暮景今如許，慙愧高人久卧廬。
好客兒童拚歡喜，多情草木自扶疎。
百年夢幻真何有，一壑風烟尚借居。
寄謝南臺溫御史，此身体戚正關渠。

又

向來多病更多憂，命與誰謀出怨仇。
坐念甘泉方避暑，不知楚澤又悲秋。
長蛇肆毒心猶在，戰馬何時鞚暫休。
橫榻故人身衛主，素書能復訊儂不。

再用韻呈允迪祕監江子我郎中二首

二紀風埃長作客了知身世是蘧廬
老來詩酒多無味亂後交親未肯踈
曾見雄風追楚賦尚堪雌霓讀郊居
願公先卜嵌巖隱泰利寧忘鄭國渠

又

異時畎畝不忘憂避俗今猶若避仇
直指威聲曾震嶽封章義氣欲橫秋
詩成故客知無敵酒盡憑誰為起謀
歲晚相逢山在眼從公脚歷頗能不

次韻必先侍御和鄭維心憶梅并寄維心

紫梅溪上春先到餘不沙邊草未芳
五字真曾賦桑落四絃猶憶調
楓香雪中孤艷應愁絕竹外斜枝不掩藏
永望佳人在空谷此時幽獨未須傷

再用韻寄沈次律學士

溪上青雲覆短牆杖藜誰共掇幽芳
忽驚候館梅花破想見山齋竹葉香
倦客鬢絲今點染使君心事獨韜藏
何當歸赴春盤約苦苣嘉蔬未足傷

次韻維心賦次律見一亭二首

次律自號
柯田山人

向來金埒與銅山可是無由未得閒
紙上功名追逸景
鏡中心事迫推顏
溪雲慣作多時別
隴月今迎一箇還
始信柯田梨棗地不令榛棘有遺刪

又

循除春水漸淙淙
心靜魔軍久已降
未省芳菲誰是伴
不妨鶯燕自成雙
眼中濁酒傾如海
門外清溪欲擬江
會見扶藜添一老
共聽疎竹響風牕

僕所借德清僧舍
居有竹林流泉之

勝恨未
得見也

次韻維心赴次律賞芍藥一首

巖前紅藥媚深幽更爲餘春一笑留
疇昔鄒枚俱倦客而今陶謝得同遊
真香雨裏來無盡妝艷風熏喜欲浮
未羨木奴千戶比主人原是醉鄉侯

次韻維心贈葛魯卿待制求花栽一首

此日寧無健步移春前行近看花時
故園樂地今餘幾小縣風光客不知
剩買名栽令亂眼却嫌芳思只撩詩

屬公歸賦丹青手問圃尋農獨我宜

盧叔才相過夜話戲成一首

七年詩酒恨難同未省相看作麼容多病襄陽長瑟縮
苦心冬夜更龍鍾已知昔者非今者莫問渠儂我儂
手剪西窓深夜燭細聽吳語話心胸

寄雲門長老持公一首

夢境清遊記昔曾而今雙鬢已鬪鬢此生有分尋雲水
到處逢人說葛藤紫芋波稜真在眼青鞋布襪未輸僧

會投枯木堂中老只恐詩情罷不能

次韻宋希仲貽故人虞仲容一首

亂前交舊今餘幾道故傷時得涕零門外溪山無賴碧
眼中鬚鬢可憐青十年持橐氣橫出三斗朝天心獨醒
却喜元龍豪放在不妨下馬索銀瓶

送希仲出守三衢一首

臨別溪山眼重開秋風揚旆更悠哉平生氣槩今逾壯
一郡清平欲挽回喪亂有誰談舊事論思此日要真才

公行勿亟朝天路帝有甘泉密詔來

次韻寄懷王元渤舍人一首

倦飛鸞省戢脩翎乞與雲山作卧屏
醉裡書床堆束筍夢餘楸局見稀星
君心儻似當時赤吾髮應無耐久青
老去尚堪驅使在會持歸櫟到溪亭

林懿成檢正見貽次韻謝之林乃同年

集英唱第偶追攀老著青衫獨汗顏
富貴逼人那得謝雲泉招我久應閑
鸞臺著展經綸手鼃禁行趨供奉班

黃髮故人空跂想應無春夢到林間

將如會稽用允迪韻留別子我諸公一首

對酒休悲落木秋霜花猶足當傳籌每憐別賦空多感
晚信離騷併是憂盞底聖賢何足論眼中涇渭正爭流
時危忍袖絰綸手行見聘書如鶴頭

送方務德提幹赴官浙西一首

時同在
鷗鷺源

二十年前湖海舊而今人物粲琅玕文章自襲家風美
骨相仍無容父寒會有忠誠能貫日不應漫浪嬾為官

他年鷓鴣行中見儻似鷓鴣源裏看

次韻沈必先尚書見別一首

翩翩旗尾破新晴頗似龍駒脫在垆再上封章辭雨露
故令高節煥丹青卿雲媚日懷仙隱白鷺迎舟宿晚汀
預想山齋春酒熟可無殘夢到南屏

次韻傅子駿右司見貽一首

大旆華鑣畫掩扉松門沙步帶山圍循除漲水春來急
釋嶠孤雲懶後歸試看青鞵緣磴道不妨野服坐苔磯

應嗟客路風塵暗遠樹驚烏未得依

次韻無言兄卜築二首

求田問舍豈徒為晚悟前言不我欺地占玉杯初應卜
門臨苔水宛分枝鄉關怪客歸何早聖主思賢降不遲
磊落胸中三萬字不應無意拯時危

又

石枕方床綠浪簾清談散帶似懷冰蔬盥尚雜水中蟹
肘翼莫揮瓜上蠅五斗為貧真世業一廛歸隱豈人能

冥鴻萬里今何慕應笑饑飛側翅鷹

張仲宗判監別近三十年經由餘不訪余有詩

次其韻

亂前猶省當時事亂後渾如隔世人得見昇平且歡喜
莫將心念到亨屯銜杯儻辦中山醉覓句誰如小庾新
三十年前癡半點相逢終不忘天津

次韻沈次律家並帶芍藥一首

習家池館酒如淮為破幽人一日齋前廡芳菲駢蒂萼

後堂鶯燕嘯朋儕忽驚暗綠將成幄却喜雙紅欲綴釵
草木會為門戶慶而今蘭玉已當階

次韻牧菴禪師持公見貽一首

袖底摩尼直萬金半生空探九淵尋波離懺罪何名罪
老可安心不見心碧澗寒泉流自古齋厨煮菜味常今
牧菴已斷人牛跡純白何妨黑半侵

次韻鄭禹功見貽一首

當年負笈京華客振臂論交法從班何武誦經來蜀郡

士龍持論出雲間
杯觴引滿風流甚
歲月驚心昨夢還
短檝未妨相訪覓
要看拄頰面西山

次韻徐季山學正釋奠先聖之作

闕里躬祠通古昔
昇平禮樂信光明
威儀復見周多士
迂鄙何求漢兩生
佩委霜侵裳繡冷
庠開風振戟衣鳴
使君肅穆神心格
更看雍容佐國衡

次韻吳興守到官見貽一首

少武初辭玉筍中
旌麾疑是到珠宮
牕間巖岫爭如入

筆下雲烟洗不空千里喜深車後雨一堂仁浹扇時風
賓筵浪許陪真賞底用蹢躅一禿翁

次韻吳興守雨中即事一首

雨檻風簷欲挈巾護花常恐減青春融怡已復生頰頰
料峭真應恕老人睡鴨吹香空結篆遠峰攢碧似凝顰
野棠泪濕愁如許半面徐妃不受勻

次韻春日書懷二首

居士而今有底忙生涯草草度年芳平林漸見薦紅委

野店初聞煮酒香尚有佳人來得得不甘春事去堂堂
勝遊早晚追千騎更看揮戈駐日光

又

水面紅雲次第鋪東君未肯向人疎興高碧嶂千尋外
春在黃堂一笑餘只怕玉醅浮醖釀不嫌花片落襟裾
公歸行侍甘泉宴留得新詩酒不如

次韻吳興紀事一首

懷紱初辭玉帝宮白蘋洲在亂雲中勸耕漢守宣恩詔

賣劍吳儂襲古風
花好未應慚洛浦
酒香何羨過新豐
他年圖畫賓筵勝
錦瑟傍邊有病翁

次韻九日四首

九日佳名今古重
鳳城秋色正明樓
厨供清釀香浮袂

恩賜黃花憶滿頭

魏帝九日以菊
花一束賜鍾繇

千里風煙殊未惡
五

亭吟嘯不應休
明年歸覲酬前賞
倘念衰翁尚四愁

二

懷紱欣臨柳惲州
據床寧羨庾公樓
雲橫浦溆無重數

花遶巖巒最上頭詩遣羊何聊共和語驚陶謝未知休
自緣風物撩人意不為閑情作許愁

三

蒲團趺坐冷知秋笳鼓聲傳出郡樓

聲一作風

閱世夢中知

是夢說禪頭上更安頭邦君化得俱吟詠居士年應賦
莫休只恐官梅能動興從梁江草喚人愁

四

向來風韻煩清秋氣壓元龍百尺樓倒載時時憶池上

朝回日日醉江頭甘泉正念論思舊輔郡仍推譽望休
勃宰嬖姍老歸客賴公與酒得澆愁

次韻雪中聽琵琶一首

燕堂曾許陪真賞似識唐昌一樹花鶴骨松身公耐雪
龜腸蟬腹我羞茶星消萬點疎還密月帔千尋整復斜
要赴回風看舞態莫令嬌恨入琵琶

題毗山吳約仲曠遠亭一首


唐吳筠詩平湖曠
以遠吳子及取以

製名尚國器為之記山蓋吳筠舊隱當時語曰
吳筠碑樸古奇稱其文辭之美也余未冠與約

仲諸友讀

書此山

追思五十年前夢山壓平湖水次門白鷺未慙公子貴
青松不屈大夫尊文辭樸凸推鼻祖標致孤高到耳孫
更喜新亭名意好吳郎清峻內郎溫



苔溪集卷五

欽定四庫全書

集部

茗溪集卷八

六至

詳校官左中允_臣瑋五珠

主事_臣呂雲棟覆勘

總校官知縣_臣楊懋珩

校對官中書_臣孫球

謄錄舉人_臣吳壽珣

欽定四庫全書

茗溪集卷六

宋 劉一止 撰

五言律詩

冬至汴下早行有感一首

刺促驚時節，侵尋念物華。
半生多客裏，今日又天涯。
曉月看眉嫵，飛雲亂眼花。
窮途隨物感，不必是思家。

和族兄無言題能仁寺當雲軒一首

綠樹新迴合，斜窗舊邃深。
壺觴如栗里，歲月似山陰。
半

世懷清隱何年得此心
借床眠不熟酒力橫相侵

次韻袁審淵道舊思歸四首

兼簡虞仲容季澤

寂寞襄陽老南山憶弊廬
病來惟喜酒歎罷每捐書
道路風塵暗關河信息疎
逢人說沙漠不忍問何如

二

十載溪亭舊揮毫見古風
相如今病渴東野尚鳴窮眼

界闕鄉物風流憶迺翁一闕

如夢斷歸思渺千峰

頃歲審淵

侍尊公官吳興以溪亭為官舍居馬僕數從尊公奕棋

三

城郭如村步官身等俗閒對棋論小墅拄頰望西山異
縣故交重閑心幽事關猶餘少年意不計晚途艱

四

虞氏隋唐後當時尺五天風煙鼻祖宅翰墨耳孫賢節
履容相躡杯觴得共傳濟時吾老矣看着祖生鞭

次韻江子我雪句一首

頭白高山早千林一夜花雪深烏鬼嶼風亂白鷗沙刺

促傷時事飄零念歲華
天今洗兵馬勿復問浮槎

梅山一首

伊昔市門隱山今尚姓梅
危言闢社稷仙迹混蒿萊
此事諸亡者斯人安在哉
傷今更懷古老憶獨悲哀

送太學舊同舍及第歸鄉一首

輦轂當年別簪裳末路同江湖
人已老家國恨何窮
山有傷心碧塵無沒馬紅
舉鞭還送客落日泪痕中

次韻予我得俸一首

祠官資薄俸肥遯要清貧
載酒久無客乞醢惟有隣
廣文寧厭肉方朔漫長身
莫遣陳長到先生甌尚塵

冥冥寒食雨

冥冥寒食雨客意向誰親
泉亂如爭壑花寒欲傍人生
涯長刺促老氣尚輪囷
不負年年債清詩新送春

風氣東南異

風氣東南異陰晴早晚間
日光時透隙雲影半遮山
掃逕殘紅盡開窓綠蔭還
寄聲桑梓友幽興合相關

綠暗山前路

綠暗山前路。柔桑宛宛垂稻秧。分隴後。鵲繭下山時。白日縑車急。中宵織婦悲。老年官賦了。不長一絢絲。

即事一首

何物當門戶。青松及我長。佳山忘歲月。同汝過風霜。北澗花應盡。南榮草欲芳。病來歡意少。一醉未全忘。

覽鏡一首

寄陳商
彥祕丞

契濶三年夢。飄零一寸心。青青今變雪。種種盡齊簪。覽

鏡渾相似彈冠各不任
論交如許酒清寄一杯深

居士寮一首

龍鍾居士相落魄
宰官身長史風吹帽林宗雨墊巾
安
心惟壁觀乞米賴僧隣
曾並駕行立當時夢不真

次韻朱賓老過我對月小酌一首

老人論舊事感慨思悠哉
暗喜生眉宇新涼入酒杯
竹
風誰汝和簷月要人陪
此客非凡客斯時得得來

遣興一首

杯業惟松韭何因老骨強
昨朝方住雪今日又加霜
寂歷僧廊暮支離野步芳
歲時渾不省得酒是春陽

次韻吳興守春日書懷一首

百榼償春酒人言有別腸
披風醒午醉擷藥眷餘芳
白日何曾短游絲得許長
向來情浩蕩今老夢微茫

送徐叔鎮知縣罷官赴調一首

劇論追前輩憂思獨在民
雪霜吾歲晚金玉子心真
曾見除書舊行膺薦墨新
君王問田叔長者更何人

送鄒德章教授之官合肥二首

晚色溪亭路風帆去莫遮交情寄桑落離恨渺天涯志
行今誰及聲名莫謾誇淮人問規範說似道鄉家

又

古寺疎煙裏因依孰並遊歌行如短李邂逅得髯鄒皎
月林塘夜青霜雉免秋從今兩相憶一酌酹儂不

次韻賓老過會稽訪余同遊禹廟龍瑞宮晚歸

二首

十載江湖客重來霜鬢侵事如春晝夢山似故人心步
屨攀嶄絕移舟出窈深他時林樾底歸去話登臨

又

禹穴徵前史龍門訪隱書相攜如故里失喜問吾廬此
日登山屐他年下澤車端能從我老騰踐未應虛

曾宏父將赴官都城示詩次韻自述并贈其行
庾信多哀思年來方解愁低徊甘吏役骭黷豈人謀擔
石終知飽私田詎敢求尚能吟玉案未忍算牙籌公子

年方壯才名惜甚休聊持江氏筆來賦謝公樓慷慨思
千里翱翔近十洲逢時寧有愧閱世自多憂客路塵沙
暗春風草木柔公行欣入洛我老謝封留日月消書帙
江湖落釣舟經綸公等事此意莫悠悠

次韻江子我郎中社飲一首

社醪遺風在田家禮數饒玉人疑解意孺子故來邀禦
寇驚先饋庾桑懼見杓習鄉俱尚齒惇族悟蔬苗未見
琬戈靜方欣玉燭調山寒時作暝火老不成歌醺酒無

留榼蒸豚發墮樵癡謳聲帶苦村若拍頻招野性踈鐘
鼎官身脫市朝形隨石骨瘦心與澗花彫朔漠音塵斷
羶裘意氣驕誰為今定遠空作老邊韶枉矢知天變雙
桃驗服妖宣和宮女頭冠作雙桃相並謂文並桃冠人以桃音逃為今日之讖獻書慙痛
哭避地獨無聊復古周宣治中興太白謠明年及春社
愁鬢雪應消

次韻予我秋分一首

山中秋已半蓬蓽晏方開不聽夜蟲語烏知節物來紫

珠猶卧穠青
紫未浮杯欲射
寄書鴈非關烹
不才

苕溪集卷六

欽定四庫全書

茗溪集卷七

宋 劉一止 撰

絕句

聞親征一首

十萬貔貅同日出
君王英武古無雙
而今將士爭豪甚
為報天驕莫戲江

賊臣劉豫挾敵騎
犯兩淮
天子親總六師出征
賊騎摧衄宵遁
蹙輿既還
效杜拾遺作歡喜口

號十二首

祖宗先德後刑誅八葉昇平振古無馴致小羌如許黠
五兵雖慘亦時須

二

聞難君王敢自安鞭笞貔虎向江干英謀睿決知誰敵
世祖周宣比並看

三

杖策初聞桑下謠氐羌酋長待來朝而今有酒須相樂

前日憂思今日銷

四

將相同謀互往來一時肝膽絕嫌猜
頗聞追騎三方出不遣淮壩足馬回

五

天戮齊東老遂臣弄兵鼠子尚窺人
乾坤整頓應須早

賦與中原浩蕩春

是日傳聞
劉豫已死

六

猛將心期箭有神
爭前知敵不知身
聖恩令貸爲軍死
汝是中朝箇裏人

七

胡兒驅馬意何忙
淮海暄風炫日光
心折關河歸不得
而今底處是家鄉

八

六代金陵是帝州
諸侯玉帛等山丘
指揮大匠新宮闕
早晚鳴鞭向石頭

九

遠人豈敢易江淹前日謀臣謬謂和為問奸諛羞死未
較量今昔孰為多

十

紅旌白馬羽林兒絲鞵當胸短策垂歸導鳴鑾何太喜
腰間金印阿誰知

十一

曉來鼓角動轅門便覺昇平氣象存他日兩宮歸就養

更看天子父兄尊

十二

東風九市遍開塲
梅柳參差近玉堂
應許侍臣俱入賀
捧持春酒壽君王

次韻徐立之朝議除夜無酒二首

功名本是誤成蠅
伎倆何勞更鏤冰
竹屋紙窓風撼幙
可憐挑盡讀書燈

又

平生豪氣忍難除尚憶咸陽五白呼詩似少陵惟欠酒
可能客舍事全無

次韻傅舍人咏褚邦直葫蘆

山瓢枵腹謾如壺不學鷓鴣夷肯借酤清夜玉堂誰伴宿
此時一盞可能無

次韻山僧善彬寄梅花

苔封老樹槎牙甚何事春風亦與期千尺寒巖無暖氣
不妨入眼見豐肌

次韻江西李相君七詠

蒼梧雲隔漫烟波
露後誰憐泣女娥
會道洗空千古恨
石心今日奈渠何

右雙蓮閣

春院花香透白間
夢餘風景似蕭閑
只今是夢誰占夢
却笑瀉山問仰山

右夢室

種橘洲邊何似好
離離丹實鬪鮮新
千頭豈為封侯比

留得芳香嗅後人

右橘亭

公家愛竹傳聞舊要看
凌冬色不浮日報平安何用許
至今好事想風猷

右竹亭

蒼筤同林一等香
芝蘭在室不知旁而今閱世如翻手
底處交情有許長

右蘭室

閩嶺風塵旋埽空挽回春色到花叢長紅小白參差見
便覺丹青入手中

右花塢

曲塘如磬何曾有坐想縈山更帶林花圃夜來春雨足
漾舟應試一篙深

右磬塘

戲題法真師見南山齋一首

看山終日自夷猶清淨誰如此比丘莫指妙高南向是

德雲還在別峯頭

題敏上人隱齋一首

水石菖蒲真活計，芒屨不借更奇哉。

借入聲

山林本是君

家物為

闕

喚去來

訪梅

瘦藤扶我到溪南，梅蕊含羞未入看。
不是今年花事嬾，北人移過許清寒。

訪石林二首

行山不用瘦藤扶度石穿雲意自徐夜過西巖投宿處
滿身風露竹扶踈

又

山澤形容忌太癯石林風範獨何如時時賓客傾家釀
箇箇郎君讀父書

過梅溪省妻父臧翊善墳感歎二首

落碣悲泉不擬聞落平橋北路頭分揚雄舊宅今安在
心折侯芭三尺墳

寂寞松岡鎖暮烟平生忠信事茫然減孫有後真虛語
伯道無兒可問天

和故人二首丁卯年九月二十二日夢中得之
平生事業較粗疎晚歲欣陪謝幼輿林下商量好消息
不須嵇子謝交書

又

目前得已便休休事業何曾有到頭客問函山孰為一
月明風靜好清秋

此篇不記第二首覺後足之覺
時已五鼓夢中他語皆語妙理

題丁氏堂六言四首

妙喜何曾斷取竺峰九日飛來乞與溪山暮宿都都濃
翠成堆

二

杯觴競醉羣玉衣袂常沾翠嵐不怕峯前路滑石頭是
我同叅

三

摠是胸中描出不妨怪怪奇奇鴈蕩龍湫髣髴鸞翔鳳

舞參差

四

翠峰欲並眉嫵艷
難爭臉紅昔日寒巖枯木何如此
箇家風

題徐次游通判小隱堂二首

遮藏得到中興日
觴詠仍陪小隱仙
曲徑畫欄春幾許
竹花人月四嬋娟

又

一時藥籠名參朮何事全家傍翠微
勿謂小山招不出
太平須要隱人歸

金陵

人物風流自六朝故山圍國尚蒼黃
只因王氣奔瑤闕
噴作江聲萬里潮

入靈隱寺

石泉苔徑午陰涼手撚山花辨色香
度嶺穿松心未已
好閑反為愛山忙

登看經樓示同遊

昔遊曾共朱欄語，斗換星移始再來。
料得當時樓外水，有情應解作潮回。

宜興道中

客懷無事只增愁，遮眼殘書懶即休。
午醉忽驚如喚覺，亂山無數滿船頭。

寄題葉叔明盛園熙春堂四首，且為他日往遊之約。

堂前草木自爭春
堂上妖嬈花妬人
年年歲歲春相似
不信風光有故新

二

橋當窻檻月平鋪
一色寒光玉不如
橋下流泉來別壑
經春綠盡可藏魚

三

個儂傳得嘉榮唱
天上偷來曲度新
他時莫向樽前誤
客似周郎解覲人

四

吹花嚼蕊橋邊路
衣袖常沾草木馨
更聽綠珠三弄笛
為君一洗海風腥

送吳興太守行十絕句

人物中興第一流
論才應作富民侯
帝憐玉筍班中秀
合付蘋花柳惲洲

二

海內文章說大門
故宜生長此兒孫
玉昆金友搃秀出

歷塊過都不足論

三

人言此邦公所私教我子弟等文師大書深刻豈足紀
願奏宣布中和詩

四

振廩已責功及物輔藩千里實分憂爾身在外心王室
咫尺應須入告猷

五

老奸屏氣舌敢出雅俗雍容歌樂康五日京兆何足數
三年子產轉難忘

六

元豐應制規模在奕奕風流自一家詞劇清新過小庾
情多兒女笑張華

七

燕寢風清晝漏長愧公延我讀書堂此日偶同元凱癖
他年儻憶鄭公鄉

八

垂老何堪此別離
感公情義獨心知
故應他日汀洲泊
獨立難忘換擢時

九

雞皮鶴髮病龍鍾
誤入林宗裁鑒中
平生氣概今如此
自對青銅惜此儂

十

且盡離筵酒一杯
貴臣寧許我重陪
他時翊贊昇平事

賦與林下歌康哉

太簡齋即事二首

太簡老人家似客室中猶恨未空虛
筋攣步澁常須酒日入中昏始廢書

又

晚來人報雪遮門委巷蕭條郭似村
自酌甕醕能軟飽借人布被得奇溫

寄題李德修通判宣城隱舍二首仍次其韻

官身寧為倦知還自憶青山對白間

白間窓也窓間連遠岫蓋謝宣城詩

有月有風俱是客愛詩愛酒可能閒

風月堂

又

性在東風浩蕩邊故將詩酒作春妍淵明好客妨何事

卿去教知我欲眠

秀野堂

和何山揔老一擊軒二首

掃洒閑庭無個事林間一擊是何聲自從當日知音後
本地風光見太平

又

此地丹青畫不成本無聖解及凡情道人來往風煙外
不是如來行處行

題楊吉老知軍玉輝亭二首

向來風月雄清地今日昇平將相家自啓窻扉放山入
使君聊欲傲雲霞

又

清間寧有清如許買斷嵐烟入樽俎我來愁此玉輝寒

要上峰頭呵佛祖

送報寧墨老二絕句

白雲到處有光輝
江北江南一杖携
妙喜風烟曾斷取
羊仙今日合全提

又

王家宅似江家宅
草木風烟各不知
王謝爭墩公案在

問師一筆判歸誰

報寧墨老受請將入院作兩絕自送之報寧在半山蓋王荆公舊宅我名

公字偶相同我屋公墩在眼中公去此墩當屬我不應墩姓尚隨公此荆公詩也公初罷相歸金陵有問公動

靜於過客者客戲答云余不知
其詳但聞方與謝公爭墩耳

苔溪集卷七